

四庫全書

集部

欽定四庫全書

集部

甫田集卷十六

詳校官給事中臣王鍾健

中書<sub>臣</sub>劉源溥覆勘

總校官檢討<sub>臣</sub>何思鈞

校對官學正<sub>臣</sub>湯垣

謄錄舉人<sub>臣</sub>鰲圖

欽定四庫全書

南由集卷十六

明文徵明撰

敘十三首

送周君還吉水敘

故工部尚書周文襄公撫循江南大有功德於民去之  
五十年為弘治己未有詔以公與故戶部尚書夏忠靖  
公並祠於吳從有司之請以慰答吳民之願思也明年

廟成廟有像設而公去吳久蔑所擬似於是公之孫廷  
器自古水以公畫像來訖事乃去吳之老長先生以吳  
人幸於奉公顏色而喜廷器君之來也謂其歸不可無  
言猥以屬某某之生在公去吳二十年之後然習聞遺  
德宛猶瞻承有不容已於言者方宣德之初當朝家多  
事之後公私弊極公以幹運之材撝富民之術以拓賦  
財之源博收衆議首勤民隱劭農振業歲亦比登民樂  
於所入而不知苦其出上享其用下茹其澤者二十有

二年徵公之績法得祀久矣顧方相安於無事而事之成固亦有竢於論之定也是故公在而樂既去而思思久而不能忘越五十年而卒用食其報於吳此固無傷於緩而益有以見公之德澤深長非苟焉圖塞目前之為也竊惟東南賦財之會百需出焉不培其根而日竭其出出倍而末亦益瘁矣方公未至之先有司誅求不少弛而積逋至八百萬公既損民常出而官復羨贏此雖公之才局去人遠甚而其理亦豈不有可推者哉今

聖天子不違民思以昭厥勲誠不能無所望於後之人也惟公恩澤繫民心功業在史官而血食之詳當有記廟之成者余特敘其槩以榮君之行亦聊以寄吳人之思云爾

僉憲伊先生感事詩序

僉憲伊先生侍其家君承德公之居吳門也某以里中契家子獲從容侍杖屨先生為言先朝拔擢之恩與先夫人子育之德輒慷慨流涕如不能已他日示某三詩

則感事之作也先生成化末自蜀梟入賀萬壽節屬龍  
馭升遐弗獲成禮為二韻詩二章先是以刑曹郎推恩  
褒錄其親而母氏遺榮久龍章賁於藏丘為四韻詩一  
章還吳來十又四年而遺弓之痛罔極之情不少置至  
是出其詩屬交遊諸公和之而命序於某某小子何用  
知此受簡累年未有所復顧其意不可虛辱也則為之  
序曰忠孝天下之大閑也然非有出於尋常日用之外  
顧其事有本末而人道之所為盡與否存焉是故厄窮

顛頓不能自見於世者常患不獲申其志而一泰於富貴狎於恩私則或犯名廢義而併其所學焉負之至於事變恩移不能無悲摧感蹙之情其事足慨也而君子乃有取於先生以為得忠孝之理焉夫豈以其悲摧感蹙以為難哉先生以進士高科踐馭中外為明執法為良監司道究當時譽聞敷於上下而寵被於君私又得以顯光其親雖其所學所養有以迓承之而遭罹昌會獨非君親之賜乎顧吾所以復之者方永而遽絕欲用



其情而無所於施其悲摧感感當有甚於不幸而不得志者其何能已於言邪此先生之詩之所為作也讀其詩知其不忘於遠而極其情為能不負於所事夫仕而不負於所事而又不忘於遠雖古聖賢之事無出此者而余顧謂無難焉何哉夫其始也不出於厄窮顛頓而卒又能不辱其身以及其親是其見於行事者既已卓然名世使無是詩固不得少其忠孝之名也而是詩之發實又至誠惻怛而出於不能自己之中然則何難哉

夫惟其不難也而後知其本於尋常日用為能得忠孝之實焉悲摧感感果足以盡先生哉先生名秉字德載其先有尚寶卿恒工科給事中侃皆名臣先生其世濟忠賢者歟

送侍御王君左遷上杭丞敘

國朝以仁厚立業更累朝列聖網維綜核之餘誕章丕緒深密完固殆無可施力而士之用世亦惟持重博大為宜或稍出廉隅有所建畫往往得喜事徇名之謗及

今百餘年所以消沮浮薄崇長忠厚誠不為無益也而其間固亦有幸於無事以自益其瘵曠之愆者矣蓋過要蓄胸謂惟因循自恕足取持重博大之名嗚呼古之所謂持重博大固如是哉往歲先君以書問士於檢討南屏潘公公報曰有王君敬止者奇士也是故吳人他日還吳某以潘公之故獲締好焉及君以行人遷監察御史先君謂某曰王君有志用世其不能免乎乃引治庚戌君以事下詔獄鐫兩階左除福建上杭丞始君按

遼陽明法守軌多所緒正用事者不便為飛語中君而其徒有氣力者又從中醞釀之而君遂得罪去議者謂君不自省約以歛怨時人迄抵禍敗或又謂君感槩激昂不能俯仰其得罪固宜而亦其所樂受凡此皆非所以論君也君以聖天子耳目之臣奉使邊檄其任不為不重而遼陽國家要害不得不慎苟為避喜事之名因循自恕以僥倖塞責則循習之弊將久而益滋而一旦事出非料則其禍之所遺豈獨一身一家而已哉故操

切屏捍惟法之循至於得罪以去固非所樂而實亦所  
不暇計其心誠不欲以一身之故而遺天下之憂若君  
者今之所謂喜事狗名而古之所謂持重博大者歟此  
潘公之所謂奇士而先君之所為嘆其不免也君將赴  
上杭取道還吳吳撻掖之士聚詩為贈而推叙於某因  
敘君之所以得罪之故而復推本其所存如此雖然天  
下之事尚有大於此者君當無以是自懲

靖海頌言叙

正德改元之禊侍御曾公以簡命按蘇蘇屬邑崇明治  
東海中其民素獷健梗治先是豪民施天泰爭魚葦之  
利噪於海濱有詔徙其家遠州其黨鈕東山者潰歸逸  
於海復嘯其徒為亂出沒鹵掠民不勝擾於是瀕海諸  
邑復大震有司以聞詔發諸路兵討之而公與今中丞  
父公實領其事夏四月首事徂秋八月竟扼賊而殲之  
降其脇從俘其老弱而四民用寧方賊之猖獗也郡郭  
亦警及是解嚴士民懽曰凡所以惠安我民以保生聚

得不及於難者皆侍御公之力侍御公實生我民其曷  
以報乃相率為詩詠歌其事而屬序於余竊惟天下之  
事不可常而人之才貴乎養之有其素今夫銜一命寄  
一方孰不幸其無事也而事變之來或出於意料之外  
彼齷齪遘奕往往避事而害成而好為不靖者又或挾  
之以僥倖於一擲以為功名之會此其人皆以身為計  
者卒之亦不能辦其身而民用受其辜焉侍御公之來  
當夫承平百年之餘而蘓又在畿輔之內豈常有意於

變哉而卒然遇之有不易於為計者而公處之無難焉  
方師之興餉給浩穰文檄旁午凡審勢相方部分調發  
莫不於公之出人皆訝其不素而克而不知其所已試  
於為邑者既嘗驗矣蓋公初以進士宰定遠適妖賊構  
亂勢張甚公設奇禦之用全其城今悉數郡之衆以當  
區區竊發之徒固已優為之矣是豈僥倖於一擲者哉  
公之出按也以志計銷頑梗以德惠撫疲瘵仁威並著  
吏畏民懷庶政之舉不可殫述茲特著其平寇之一事



云爾

送劉君元瑞守西安叙

正德戊辰金陵劉君元瑞以刑部屬出守紹興尋以先  
事忤權倖罷自被命至去郡為日僅五十有六然而紹  
興之人惜其去如失慈母父老子弟奔走追餞爭致餽  
遺君悉麾去無所取乃相率飾祠廟肖君像事之於是  
劉君之名一日聞天下庚午更化悉起前時被斥之人  
首擢君知西安府君初罷官貧不能歸迤邐至吳興吾

友吳君汝琇客之至是汝琇與郡掾掖士聚詩為君贈  
不遠百里走吳中乞余敘其事余惟劉君奇才雋望遭  
罹盛會當有名公碩儒道譽揚摧而何以余言為哉汝  
琇曰此劉君之意也雖然古之人贈人以言得其善則  
稱知其過則規余於劉君何居曰劉君不走求王公貴  
人而必子焉是徵其意非直以譽而已嗚呼此劉君之  
所為異於人而一郡有不足言也夫君以兩月之政而  
能歸乎數十萬戶之人以聳動乎天下雖天下之人莫

不以劉君為不可幾及也而君顧不以自足若有望焉  
誠以事變之來靡有窮既而隆譽之下讒毀攸基方其  
去紹興也天下之人想聞其風采莫不欲以為郡以為  
猶紹興也然而風土有遐邇事緒有順逆而人心有從  
違君自視於此果能皆副其意乎一有不獲則舉向之  
所有而盡廢之加疵焉是故以黃次公之良天下習其  
名人主欽其節而卒之不能周旋於末路夫豈其後之  
所為真有忝乎哉良以望之者厚也望之也厚則其責

之也深顧茲藐焉而人之望之若此其責之若彼則亦豈易為酬哉君不以人所不可及者自多而以所不易為者自力則其所至獨可以收譽於一郡而止邪始君之罷也間闕羈逆人將不堪其憂而君蕭然自得方益進於學圖史筆硯若將終其身一旦起自閒廢寵以壯郡莫不為君喜也而君方有懼焉此其中豈無所見哉往余嘗從人聞君紹興之政而吾友陳君魯南王君欽佩顧君華玉君鄉人也又為余道君文學制行之詳竊

慕之其居吳興距吳門數舍而近雖不及接話言而相聞為稔故於君之行也不嫌於規

送提學副使莆田陳公叙

正德壬申之秋詔嘉興守莆陽陳公為山東按察副使領提學事先是弘治中公以監察御史視學南畿振德警愚軒輊惟允數年之中士修名行而文以丕顯朝野翕然稱之謂公之道化流行得古人表帥之義未幾逆豎盜權謀亂庶政天子惑之公上疏極諫遂以得罪鐫

兩階左遷潮之揭陽丞朝野又翕然稱之謂公之風采磊落有古人正諫之風及朝廷更化同事者往往內補而公稍起倅嘉興尋以為守於是朝野之人莫不惜之以為公之賢明宏達宜在師資之地守振肅之職而顧浮沉常調不亦負乎此固天下之公言而某則以為世俗之見耳非所以論公也比公雖官御史而奉使於外非在得言之地可以不言而言之異有以行之耳得罪去國豈其志乎夫既已得罪則投竄推辱有所不辭又

奚班資之計耶苟計於是則患失之心惟日不足克位  
固恩齟齬自守又甚而敗名棄節以獵華要高爵厚祿  
垂手可得舍是弗圖而區區於外內升沉之間雖愚人  
不為也而公豈為是哉惟其無心於是是能效忠輸誠  
慨慷激發得以行其志而成其名視彼僥倖恩私以徼  
榮一時者涕唾之不若也又足以辱公乎哉而天定理  
還事不終敝所謂高爵厚祿卒以畀之此雖理所必至  
而事有不盡然者則幸不幸存焉幸而得之於公為無

負不幸失之則其所為高一世而望天下者固在也公  
又何媿乎夫公不圖世之無負於我而求有以無媿於  
世充是心也蓋有無入而不自得者雖宰天下可也一  
方視學之寄果足為公重輕哉雖然自公為丞而倅而  
守天下之人想聞其風采蓋莫不願為之奔走也而魯  
獨得之經天下者殆有意乎何者魯為聖人首化之地  
比歲盜賊殘毀瘡痍特甚非仁明愷悌以斯道為任者  
固不能撫摩而振起之也公行矣濟溺起衰將為天下



先也某以諸生辱公國士之知十年於此潦倒無成方懼為門牆之羞而公眷存不已今茲由浙而魯得再見於吳門因獻是言而必以天下望之者固天下之論也

送開封守顧君左遷全州敘

余友顧君華玉少負才雋以文學聞於時筮仕宰廣平又以吏能聞升朝為郎以清強聞及守開封綏懷得情剗裁靡室而其聲聞益閎以達余交其人久竊嘗考其所為而得其所存蓋天下士也或從毀之數其隱過不

遺餘力余始駭歎考其所為與察其所存無或異也正  
德癸酉君得罪中官逮赴詔獄一時人莫不危君而余  
竊為君喜已而君竟被罪錮三階左除廣西之全州余  
乃益信余之所見不妄而君之事誠有人所不可及者  
蓋人之所為誘於外者不能堅其中而順於道者未始  
計其外使君而能周於外以獵譽於時人則譽日益至  
毀亦從之身躋膺仕而道斯詘矣君子求信於道而不  
必崇其身寧失時名而不受識者之毀言考君之所為

得罪果以其道歟抑不以其道歟必有識之真而辨之  
得其實者毀若譽於是乎在而向之毀之者安知其不  
愧而為譽乎夫始之毀之不遺餘力將以敗其行也卒  
之無益於敗而反以譽焉至其得罪而去人方危之而  
余竊以為喜若是則譽毀榮辱皆不足以論君而所謂  
文學吏治足以盡君乎哉然余卒以天下士避之亦求  
其所存而已君故吳人而家金陵及是便道過家上冢  
以行余得合諸友賦古律詩八首為餞敘其首

送崇明尹吳君赴召叙

崇明為蕪屬邑治大海中僅若一島故雖稱內服而不  
得與列邑比其官府制度賦出章程視列邑率損十九  
然其民獷健易動又其地有魚鹽之利易爭以擾而與  
戍兵雜處一失撫寧輒梟獍以逆故其令長必循良重  
厚為宜而仕者往往不願得之或得焉憂畏忿懟同於  
投竄一日代去輒喜如釋所負蓋其心鄙夷其民不屑  
與理而恒傳舍視之噫亦過矣臨川吳君之為是邑也

值邑豪施氏俶擾之後痾瘼潰竭公私頽敝而遺孽方  
潛禍未已君爬疏剔抉隨事經理而誠心撫循之邑用  
大治逋蕩消弭無釁以發久而民益附以信未幾有游  
寇之警君益料簡民兵繕治干櫓甫集而寇至以有備  
得弗擾及是被徵且行為余道邑中事歷歷謂苛嗣得  
其人可以永理無患不然更兩年敝矣蓋苛條煩獄與  
夫銳事徵名之為皆足以尸之而其憂方深也若是豈  
獨崇明之人不能釋君而君之心殆不欲遽遺其民而

去之也君為崇明四年而厭難折衝恒居六七此人情所不屑所謂憂畏忿懟同於投竄者而君安焉既釋而去孰不幸喜顧獨置憂不已此其心豈以崇庠近遠為念而區區官爵為足以易其愛民之心哉以愛民為心則政必出於實而不以崇庠為念則所職為易修操履實之政而供易修之職焉往而不得治哉易外而內去州縣而即省臺固不足為君喜而亦不足為君慮也

送嘉定尹王君赴召叙

國家之制特重臺臣而其任也往往選於有司之良惟其職與民親而所理錢穀獄訟與夫簿書期會皆官常所急既久而習可以推行宏致故其授不得不重而於其中尤重進士之科然其位下且遠視京朝官尊重不啻什伯進士入官或厭棄不屑而得之者庸庸循守以基歲月甫三朞而已束裝埃徵矣視其民曾傳舍之不若而民之視之亦若過客去來漠然無所與者嗚呼國家之所為重臺臣之選而必有待於有司者其意固如

是哉四明王君以戊辰進士出知蘇之嘉定歷歲甲戌始以御史徵而嘉定之民重惜其去顧其勢不可留則謀所以繫君之思而耆民劉濤氏從余乞言余於君有雅故固嘗重其為人而於其去嘉定而就徵也加重焉蓋君自戊辰入官抵今六七閱歲苟能規隨趨辨以釣聲名以承上官之意則君內徙久矣萬一前此徙而去也不知嘉定之民所為戀惜君者視今日何如也古之仕者重久任而下聲名蓋任不久則澤不流而聲名盛



則誠或不至而民受其敝故余不惜其徙官之獨後而獨幸其得民之久且深也於此有以知君之所存能以民事為急以久遠為計而非苟焉圖塞目前之為也若夫錢穀獄訟簿書期會與夫官常所急乃所深習而練焉而朝廷所為重臺臣之選必有待於良有司者君庶幾其無負哉

送提學黃公叙

國家取士之制學校特重自學校升之有司苟諧其試

則謂之舉人自有司升之禮部苟諧其試則謂之進士  
凡世之大官撫仕悉階進士以升進士之升有司禮部  
實操之樞焉然而士習之隆汙儒風之顯晦不與也惟  
督學憲臣為能軒而輕之憲臣之所趨士亦趨之憲臣  
之所格士亦格之有不待文法教令而自無不及者蓋  
其職專而其地又近故其於士也親而為之化之也易  
學校之所養有司禮部之所舉皆是人也是故有司禮  
部能舉之督學憲臣能化之憲臣之所任不既重哉比

歲督學南畿者操其所謂主意以律士而峻法臨之謂  
必合於是而後可學者至於摘抉經書牽率詞義以習  
其說而士習為之一變有識者嗤之於是莆田陳公至  
特矯其弊而變焉陳公去而黃公嗣之黃公蓋嘗出陳  
公之門者凡其所為悉出陳公而輔以高朗之識優以  
雍容之度破崖岸畧章程而一出於正其所取士往往  
向時摘抉穿鑿者之所不齒而向所稱合格之士率廢  
不錄於是士皆崇碩大而黜異說上博綜而下訓詁數

年以來士習為之一變而善焉士習而善則有司之所  
選禮部之所舉與夫朝廷之所登用有不善焉者不可  
得也嗚呼若公者豈非所謂能充其任者耶正德九年  
公以年勞擢拜按察司副使視學廣西屬學諸生咸惜  
其去而某特敘次其所為變士習者如此某在諸生中  
最為凡下然不能摘裂牽綴在曩時為甚而其見廢也  
視諸生亦甚故今之惜公之去也視諸生為獨深

送侍御吳公還朝詩敘

正德八年監察御史吳公持節按太平諸郡軌道緒正  
無所規隨扶微興壞所部振肅屬傍省盜起流劫新安  
公疏捕追北境以寧救一時稱才焉然公重遲自將不  
事搏擊而能達一方之急以宣明天子之恩其展采錯  
事有出於尋常按職之上者列郡譽之而新安之民懷  
其保釐之庸加譽焉及是代去相率歌其功能不遠千  
里以序屬余余不及識公而獨喜公得下人之譽有不  
易易者夫國家建置百司各有專職惟御史隨事任授

不恒厥居而其任特重是故在內御史能言之而羣僚  
九列聽之在外御史能行之而藩鎮諸司承之昔之論  
者謂其居中得與宰相相可否以為重而不知今之在  
外者之重也而其中尤重巡按之任蓋今之制凡倉儲  
學校軍政茶馬鹽鐵之屬並御史關決然皆不相侵越  
而巡按御史獨得綜理而所部百官聽其軒輊事竣例  
以數語標刺其名上諸天官卿天官卿按以黜陟恒十  
九焉蓋天下之大天官卿不盡見聞而天子之耳目惟

御史是寄御史實代天子行事故所至藩鎮大臣郊迎  
惟謹郡刺史而下謁見拜俯喘懼惕息若不勝任而御  
史坐而詔之一有號令自藩鎮以下莫不奔走趨赴而  
是非得失往往竊議於下不以白間有以誼爭執者然  
亦鮮矣夫御史以一身臨百司之上以隆重之勢下視  
俯首趨事之人以當其傍睨竊笑而不之知若是得不  
敗以完足矣而或譽焉非其才足以濟物明足以燭理  
而重遲周慎有以任其事固不可得也余於新安之人

頌公之言而有以知公之不易也公名鉞字宿威撫之  
崇仁人

壽大中丞見素林公叙

成化弘治間中外之臣以氣節行能高天下者三數人  
而已一時朝廷之所倚注臺諫之所掄擬與夫大夫士  
之瞻屬依歸必在三數人者今大中丞見素先生莆田  
林公實一人焉孝考當宁三數人者以次獎擢亦既効  
用於時至於今三十年或老或死淪落殆盡而公巋然



猶系天下之望嗚呼偉哉公於是年六十餘聰明強健  
不減壯時而居閒既久無復當世之念會蜀寇告急中  
外恒擾乃復有意事功朝召夕起束甲西馳專融妙畧  
卒用戡夷大難保蜀餘命功甫告成而公之身已在閩  
山之南矣夫聞難而出功成而去之豈獨今之人所少  
哉而公履之已素有不待今日而見者公初以司寇屬  
上書言天下事指斥佞倖幾蹈不測既而收自放棄起  
歷要途若可懲矣而軌法糾檢又多忤物旋起旋廢曾

不能三年留也而天下之人方共高之公之心固不可  
誣哉推公之心求公之事其有無益於當世必有能辨  
之者今四方多事用材如渴朝廷每申求舊之典而公  
方堅保晚之節或者謂公用不盡材於海內有遺望焉  
嗚呼此又奚足病公哉太史公有言人有所貴亦有所  
不如天不尚全故世作室不成三瓦而陳之使公都位  
食祿而享上壽造物者且將忌之矣於此或有損焉豈  
朝廷天下之利哉吾是以謂究公之用固不若完公之

福之為美也公文章道誼蓋於一時聲名出處重於朝著婆娑故里順登期頤為天下大老以潤飾斯世顧豈不多於彼哉此公所為有樂於是而無用彼為也公於先溫州最故而外舅叅政吳公惟謙在郎署時實又聯官相好某以通家之故凡一再接公別去十餘年光儀教範奕奕在目公之弟壽州守曩教長洲某以諸生獲出門下及是解郡南歸道出吳門為余道公動定甚悉因徵言為壽用敢論次如此而不以公用世為願者斯

特徵明厚公之私言也若夫君相之情朝野之論與夫小人望治之心固將挽公而出之莫釋也嗚呼三朝舊臣所餘無幾天下之事將有屬焉公其自愛

贈長洲尹高侯敘

長洲為蘓輔縣隸於郡下郡當東南要劇賦發章程率倍他郡而餼館勞狹靡有休閒郡既壯大而郡官尊安往往委勞於縣而長洲率先任之其繁視他支邑不特相百而已又其地介於東南卑瘠多滯民衆而貧稍急

則歛怨緩則僇辱隨之繁詞聚獄又每困塞故為之者  
鉤撫審畫矻矻簿書間救過不暇矧能潤飾以儒優游  
文翰而稱治辨乎若夫才優剗剗而譽以文敷雍容燕  
笑而課奏罔後數十年來吾得高侯焉侯以進士高科  
試邑於此始至而吏讐其嚴既而民安其業上官與其  
能暮年之間邑以大治譽聞隆赫旌褒加焉然求其所  
以為理每出於簿書期會之外而讀書為文無廢業焉  
間引邑中賢士與相倡酬所歷山谿輒形紀述風流篇

翰照映一時論者往往以文學譽侯而不知侯之心未嘗不以民也昔宋王禹偁以大理評事知長洲日事賦詠竟以文學知名徵入館閣在當時未嘗以吏最稱也然其言曰一邑之政田有暴賦丁有常傭春役而夏不休朝令而夕必具小則懲之以殿最大則懼之以刑法蓋極敘為縣之勞而不以宓子彈琴為是是豈專事賦詠以文章自好者哉蓋以政事行其所學而以文章蓋其所長其志固有在也豈若區區健吏收譽於一邑微

榮於當世哉去今五百年為邑而課最者不知幾何人  
今皆不能舉其姓字而禹偁風流奕然可想然則侯之  
志固有在此而不在彼者侯今以政事被旌固侯乃心  
斯民之效而非侯之所榮也以為文學而譽之又豈足  
以盡侯哉

甫田集卷十六



欽定四庫全書

甫田集卷十七

明文徵明撰

叙十一首

玄墓山探梅倡和詩叙

吳玄墓山在郡西南臨太湖之上西崦銅坑映帶左右  
玉梅萬枝與竹松雜植冬春之交花香樹色鬱然秀茂  
而斷崖殘雪下上輝煥波光渺瀰一目萬頃洞庭諸山

宛在几格真人區絕境也但其地僻遠居民鮮少車馬所不通雖有古剎名藍歲久頽落高僧韻士日遠日無苟其人非有幽情真識不能得其趣非具高懷獨往之興不能即其境而遊矧能發為歌詩品目詠讚以深領其勝耶此余於方伍兩君探梅之作而有取焉古之名山往往以人勝所貴於人豈獨盤遊歷覽而已有名德以重之高情雅致有以領之然非文章雄傑發其奇秘亦終泯泯爾是故山無淺深近遠苟遭名人皆足稱勝

天下吾吳號山水郡然知名當世則虎丘靈巖耳蓋顧  
野王之文清遠道士李太白韋白諸人之詩歌有足重  
也若玄墓之勝誠有不在二山之下者而一時之人能  
道其名者鮮矣豈非未遇其人文章之不立歟或謂永  
柳諸山以柳子諸文傳而柳子之文之奇非永柳諸山  
不足以發二君他詩固多清麗而評者謂玄墓諸篇尤  
勝殆山水之奇有以發之耶而其幽情真識與夫高懷  
獨往之興實足領之又其人皆清脩有立仕以政顯隱

以操稱不肯碌碌後人充其所至必將名世他時當有讀其詩而想見其人以歆茲山之勝者余故叙而傳之

送太常周君奉使興國告祭詩叙

今天子入繼大統之初首議推尊所生而輔導大臣以宗法不可紊正而繼統不得顧私據禮執論至於再三天子用其議卒考孝宗以端萬年之統帝所生以隆一時之孝事出權宜尊有所屬天下翕然是之而建說者獨謂追崇所生疑若未盡天子亦以為未盡也顧禮有

經常不欲自用特付大廷議之而大臣守前議不變天子孝思純篤必欲申其至情微示所向諫官往往獲罪而二三大臣遂相繼引去於是巷議紛然謂且悉從說者之言而遂廢所後之禮人心危疑中外涵涵然而天子實不用其議也乃嘉靖三年四月有詔尊所生為皇帝而所以考孝宗敦所後於前議無改焉詔若曰朕於正統不敢有違而所生至情亦當兼盡王言一出中外釋然知聖天子之意特欲申其至孝焉耳於戲孝者天

之經地之義也聖人制孝所以盡人之情以行夫禮禮者天理之文人事之則聖人制禮所以節人之欲以正其情是故天下不可一日無禮無禮則亂亦不可一日無孝無孝則賊夫禮與孝也凡民不可無也而況天子乎而況大臣有經天下之責者乎二三大臣所為不忘引去者欲以行夫禮也聖天子惓惓於所生者欲以行其孝也然孝不可無禮而禮寔有以通於孝愚於此有以仰見聖天子之明能用其孝以祔於禮而尤重夫二

三大臣之去得申其禮以全夫孝孝之至禮之盡天下其庶乎名號既成儀文斯舉於是天子有事於園寢以從臣將命而太常丞周君德瑞與焉在朝諸君咸賦詩贈行以余有同鄉之雅俾叙首簡始禮之舉也時多異議而君子或不能無疑於其間故余於此深論其事以備他時折衷云

送陸君世明教諭青田叙

吾友陸君世明以鄉貢士試禮部得乙榜授青田教諭

或謂君高才雋望當收制科躋臚仕以大有為於時冷  
員散地非君所宜得而君不恤也國朝之制雅重進士  
之科而乙榜即進士之副然今之高官要職非進士不  
畀而乙榜例得學職一隨其中輒不復省錄浮沉常調  
或終其身其間以譽望自拔而顯仕者間亦有之然而  
鮮矣故進取之士往往匿年規免以覲他日而或時命  
不偶迤邐歲年乃有畢志儒官不沾一命者嗚呼豈不  
重可惜哉君少與余同遊學宮而君天才夙出矢口迅



筆藻麗煜然每就試據案疾書視他人章追句琢方事  
思惟而君數百言已就莫不暢達雋永而傳於理故御  
史按試莫不賢異之謂其取進士不難也然每試應天  
輒斥不售自弘治乙卯至正德己卯凡九試始得舉於  
鄉及試禮部又斥不售自正德庚辰至嘉靖丙戌凡三  
試始得乙榜夫以君之才之敏如此而其進之之難如  
彼豈不有命哉苟不自省而勉焉以求其畢志儒官不  
沾一命吾不敢謂無也萬一有焉豈不重負其所有哉

而況其所就或有出於進士之上者此君所為俯首以求就其所志而冷員散地有不暇恤也我國家學校之設甚緩也而實要也甚輕也而實重也何者世之盛衰繫人才之賢否而天下之賢胥學校焉出今夫脩一職治一事其效易見而所及有限豈若賢者之興隱然為一世之重而其澤之所被有不可量者然則何有於進士哉吾知君必以此自貴而無用彼為也雖然學校誠要也而或緩焉誠重也而或輕焉則系其人何如耳是

故得其人則重且要不得其人則緩且輕君尚進於是哉

送周君振之宰高安叙

國家入仕之制雖多途而惟學校為正學校之升有進士有鄉貢有歲貢歲貢云者有司歲舉一人焉鄉貢率三歲一舉合一省數郡之士羣數千人而試之拔其三十之一升其得雋者曰舉人又合數省所舉之士羣數千人而試之拔其十之一升其得雋者曰進士凡今之

名臣碩輔與夫建功植德顯名當世者皆進士也故凡  
今之高官要職非進士不畀進士尚矣其次則鄉貢鄉  
貢率起自冗散其得邑往往鄙小其畀授率下進士一  
等其能建功植德自拔而埒於進士者蓋有之矣然非  
銖積寸累矻自守鮮不敗者非聲名隆赫突過進士  
不得顯官而浮沉常調終於下位者比比也故有志當  
時思自樹立者往往厭薄不屑必需進士以升此其所  
志良是矣而君子所恃以自見乃有出於進士顯官之

外者余少隸學官同遊之士無慮百數十人而與余同志者才三數人三數人者其氣同其業同其發為文章著於行又與夫羣試於有司無不同者蓋莫不憫然思以自見於世也故一時之人所望而覬其有立未嘗不在三數人者周君振之其一也既而三數人者以次升用而振之數試不利竟以鄉貢從選調得知瑞州之高安振之在三數人中其名獨盛而滯於學官為獨久又不得進士而從選調以去故知振之者莫不惜之謂且

不屑也而余獨不謂然何者其所恃以自見於世者在志在氣業在文章行入而非以進士也且國家所謂隆進士之科者豈不以其所業哉其業則經史也言行也修治之具聖人之道也是皆學校之所講習固鄉貢之士之所同也嗚呼振之之所志猶夫進士也而其所業與其所求而至者猶夫進士也其自拔而埒於進士也何有哉若夫銖積寸累屹屹自守固其所素負以自立者而聲名隆赫突過進士以獵顯官則有命焉而非振

之所能容心其間余固不暇為振之道也高安瑞之輔邑在江右為劇地前此皆進士領之今授振之經國者固以進士望吾振之也振之行矣其無以鄉貢自畫

送周君天保知來安叙

山陰周君天保以辛巳進士知宛之東阿朞年而縣大治當道者才之謂縣小不足為也移知應天之溧陽未上以憂去服闋改授滁之來安於是人咸歎之謂周君之才常小東阿不足為也移而去之宜得壯縣以騁而

來安猶東阿也周君為之得微枉其用乎而余獨謂非然也我國家用人惟其才其畀授視其所堪惟進士入官則惟以名第其用為縣亦惟以名第然縣有遠近地有厚薄事有簡劇而人之才有能有不能或盭焉鮮不敗者近制稍事消息期年而察之視其治狀與地之宜而易置之俾得隨力展錯無廢材焉此誠經國者曲成夫人材類古器使之道而實非也凡今之仕有中外而仕外為難仕州縣為尤難縣有小大其相去不啻倍蓰



而其為之難易亦倍蓰然而君子視之均之為不易也  
誠以縣令之職導揚風化撫字黎氓其事有祠祀有學  
校有傳置廩積有河堤道路有科差有籍帳勾稽省署  
悉總於令而盜賊蟲霜旱潦又其異者初不以小邑廢  
也苟處失其道其敗也視大邑為甚何者地狹鮮產民  
貧而寡業賦出無幾而役力章程不可但已非若大邑  
地大以饒儲侍有素而人力物產足以供之處得其道  
誠無難者是故邑無小大無難易惟在處之得其道與

不得其道耳來安在大江之北實惟畿輔望縣其地當  
淮徐河洛之衝旱暵蚤賊歲比不登民饑而虛而盜時  
竊發周君之行科差籍帳紛錯叢挫勾稽省畫悉萃其  
身其憂方大也而何枉之云哉或以君才敏而志高工  
為文章力追古作喜得僻左地而以其暇逸究于其業  
又其地屬滁有瑯琊醉翁之勝而君寄興高遠將以自  
適今若是不已負乎雖然不足病也昔者子貢問於子  
賤曰何為瘦也曰憂官政也世謂子賤宰單父彈琴而

治則為縣而暇逸無若子賤者而其言如是則亦何嘗  
不憂哉憂得其道樂在其中矣周君亦求其道而已得  
其道雖日事吟諷肆情林壑不害其為憂官政也不得  
其道則矻矻簿書徒見其勞耳何補於治哉余嘗識周  
君之兄若弟雅聞其人及是邂逅傾吐遂得其心事蓋  
能以道自勝而非可以地而易其志者會其鄉之大夫  
士徵文為贈遂深言之而不嫌於規也

陳氏家乘序

陳氏家乘者長洲陳公希正所修陳氏宗譜也不曰宗譜而曰家乘者凡陳氏所受三朝辭命與凡累世文獻皆在焉陳之先徙自鳳陽由建炎南渡抵今四百年可考而知者元翰林學士同知太醫院事良炳而下僅僅七傳傳其所可知其不可知者不敢強附以重誣其先也按陳媯姓系出於虞周武王求虞後得胡公滿而封於陳因以為姓其後楚滅陳敬仲奔齊故齊楚皆有陳氏秦末勝起陽城死於汝陰平起陽武而封於曲逆子

孫散處莫詳所終漢魏之間蕃實最著而莫究所始要  
皆胡滿齊完之裔也鳳陽在宋為濠州故屬楚之淮南  
漢御史大夫萬年魏尚書令矯矯子侍中騫皆故濠人  
公之先必有所祖而文獻無存莫之有考焉且學士仕  
元官三品既顯融矣在當時豈無辭命之頒交游文翰  
之贈而一蹟不傳及今子孫欲追其始藐不可得蓋不  
能無遺憾焉公之為是夫亦無使後之子孫有憾於今  
猶今之於昔也余讀其書詳而核析而不分聯屬而不

素上不誣其所出而下焉得以引其世而所為不忘本  
始之意蓋惓惓焉厚矣哉公之志也夫昧於源本不知  
所祖者失之薄援引攀附而妄祖名人者失之誣與其  
誣也無寧畧於所始而傳其疑焉乃或因仍苟簡併其  
所知廢而弗錄時移世易子孫至不相通如蘇洵氏所  
謂相視如途人然失亦甚矣其又甚者歐陽子曰不知  
姓之所自而昧昭穆之叙則禽獸不若嗚呼可不懼哉  
若公者庶乎免夫其得逴於歐陽子之責也已公名寵

以儒醫擢用厯官太醫院使致仕進通政使司右通政  
云

宜興善權寺古今文錄叙

宜興古荆溪之地帶江襟湖在東南為山水之邑谷巖  
幽窅流瀨清澈昔人有樂死之願其勝有可想者又壤  
僻而迂更兵燹為少故又多古剎名蹟善權寺其一也  
寺據離墨山之南麓有三洞之勝猿薨桓桓猶唐故物  
豐碑巨刻亦往往而在然其事具邸乘甚畧而寺未有

特志也寺僧方策取金石之存者合近時名賢篇詠輯為古今文錄於是山之文獻始備而其勝乃益顯夫山水之在天下大率以文勝彼固有奇瑰麗絕無待於品題者而文章之士又每每假是以發其中之所有卒亦莫能廢焉柳子厚記永柳諸山本以摭其抑鬱不平之氣而千載之下知有黃溪鉅鉅者徒以柳子諸記耳然則山水之勝果不有待於文哉若夫佛氏之學務以悉空諸有而言語文字又其所幻而惡焉者然而古之名



僧勝士又不皆離乎言語文字之間而其名迄以是傳  
豈無上之業未易登援而言語文字即其次耶此策之  
所以惓惓於文錄之輯也策又發山水之奇釐為二十  
四詠而吾鄉沈啓南先生悉為賦之是不特能輯其  
成而已余嘗約策遊山中而未能遽往姑叙其書以先  
之

晦菴詩話叙

子朱子之學以明理為事詩非其所好也而其所為論

詩則固詩人之言也嗚呼理固無不該也而況詩乎哉  
世盖有工於吟諷而不得其故者或終日論議而諧諸  
音聲輒不合作要之其於理於詩皆未為有得也練川  
沈文韜氏以明經遊學官而特好為詩取凡朱子平日  
論詩之語萃而為書曰晦菴詩話豈將會理與詩而一  
之耶夫自朱氏之學行世學者動以根本之論劫持士  
習謂六經之外非復有益一涉詞章便為道病言之者  
自以為是而聽之者不敢以為非雖當時名世之士亦

自疑其所學非出於正而有悔却從前業小詩之語沿  
謊踵敝至於今漸不可革嗚呼其亦甚矣說者往往歸  
咎朱氏而不知朱氏未始不言詩也觀於文韜之書可  
槩見已若其所論當自有識者取之小子何述哉

重刊舊唐書叙

嘉靖己亥吳郡重刊唐書成書凡二百卷本紀二十卷  
志三十列傳百有五十石晉宰相涿人劉昫撰初御史  
紹興間人公詮視學南畿以是書世無梓本他日按吳

遂命郡學訓導沈桐刊置學宮工未竟而公以憂去及是書成以書來屬徵明為叙按唐令狐德棻等撰武德貞觀兩朝國史至吳兢始合前後為書百卷而柳芳韋述嗣緝之起義寧訖開元僅僅百餘年而于休烈令狐頔以次增緝之起建中而止於大厯元和以後則成於崔龜從厥後韋澳諸人又增緝之凡為書百四十有六卷而芳等又有唐厯四十卷續厯二十二篇皆當時紀載之言非成書也晉革唐命昀等始因舊史續成此書

然五代史昀傳不載此事豈其書出一時史館而昀特以宰相領其事耶然不可考也或謂五代搶攘文氣卑弱而是書紀次無法詳畧失中不足傳遠宋慶厯中詔翰林儒臣刊修之自慶厯甲申至庚子厯十有七年成新書二百二十五卷視舊史削六十一傳而增傳三百三十有一別撰宰相方鎮及宗室世系宰相世系四表續撰儀衛及選舉及兵及藝文四志所謂其事則增於前其文則省於舊實當時表奏之語而弟賞制詞亦謂

閱博精覈度越諸子良以宋景文歐陽文忠皆當時大手筆而是書實更二公之手故朝野尊信而舊書遂廢不行然議者則以用字奇澀為失體刊削詔令為太畧固不若舊書之為愈也司馬氏修通鑑悉據舊史而於新書無取焉惟周益公稱其刪繁為簡變今以古有合於所謂文省於舊之論而劉元城顧謂事增文省正新書之失唐庚氏尤深斥之乃極言舊書之佳其所引決海救焚引鴟止渴之語豈直工麗而已自是一代名言

也然則是書也其可以無傳乎雖然不能無可議者段  
秀實請辭郭晞有吾戴吾頭之語新書省一吾字議者  
以為失實是矣而舊史秀實傳乃都不書夫秀實大節  
固不以此而此事亦卓偉可喜柳宗元叙事尤號奇警  
且鄭重致詞上於史館若是不得登載則其所遺亦多  
矣甚者詆韓愈文章為紕繆謂順宗實錄繁簡不當拙  
於取舍異哉晁氏所謂多所遺漏是非失實者耶甚  
矣作史之難也心術有邪正詞理有工拙識見有淺深

而史隨以異要在傳信傳著不失其實而已今二書具在其工拙繁簡是非得失莫之有揜焉彼斥新書為亂道誠為過論而或緣此遂廢舊史又豈可哉此聞人公所為梓行之意也是書舊嘗刻於越州卷後有教授朱倬名倬忤秦檜出為越州教授當是紹興初年抵今四百年矣其書復行而公又出於越其事豈偶然哉先是書久不行世無善本沈君僅得舊刻數十冊較全書才十之六七於是遍訪藏書之家雖殘編斷簡悉取以從



事材閱惟審一字或數易歷三暑寒乃克就緒其勤誠有可嘉者因附著之

何氏語林叙

何氏語林三十卷吾友何元朗氏之所編類倣劉氏世說而作也初劉義慶氏採擷漢晉以來理言遺事論次為書標表揚權奕奕玄勝自茲以還稗官小說無慮百數而此書特為雋永精深奇麗莫或繼之元朗雅好其書研尋讀繹積有歲年搜覽篇籍思企芳躅昉自兩漢

迄於有元上下千餘年正史所列傳記所存奇踪勝跡  
漁獵靡遺凡二千七百餘事總十餘萬言類列義例一  
惟劉氏之舊而凡劉所已見則不復出品目眎分維三  
十有八而原情執要實惟語言為宗單詞隻句往往令  
人意消思致簡遠足深唱嘆誠亦至理攸寓文學行義  
之淵也而或者以為摭裂委瑣無所取裁骫骳偏駁獨  
能發藻飾詞於道德性命無所發明嗚呼事理無窮學  
奚底極理或不明固不足以窮性命之蘊而辭有不達

道何從見是故博學詳說聖訓攸先修辭立誠畜德之  
源也宋之末季學者習於性命之說深中厚貌端居無  
為謂足以涵養性真變化氣質而究厥所存多可議者  
是雖師授淵源惑於所見亦惟簡便日趨偷薄自畫假  
美言以護所不足甘於面墻而不自知其墮於庸劣焉  
爾嗚呼翫物喪志之一言遂為後學深痼君子蓋嘗惜  
之元朗於此真能不為所惑哉元朗貫綜深博文詞粹  
精見諸論撰偉麗淵宏足自名世此書特具緒餘耳輔

談式藝要亦不可以無傳也是為序

備遺錄叙

備遺錄者錄建文死事諸臣而備國史之遺也錄昉於  
宋公端儀而成於張公芹榔陽何公孟春實嗣葺之今  
太倉守馮君意有未盡又為補益而并刻之刻成使門  
人太學生王夢祥視余畀叙首簡夫忠孝節義天下之  
大閑死義之人國家元氣之所繫昔之論者謂夷齊存  
殷以排周周以有道興而夷齊不害為仁聖人亟稱之

所以礪生民而窒不軌也自古國家未嘗無骨肉之變而唐之太宗出不得已然不免後世之論者春秋之義也我國家壬午之際事出非常視臨湖之事尤為有名而一時死事之臣獨視王魏諸臣為有光夫王魏身事建成親覩臨湖之事卒之反面以事太宗曾不聞有所徇其豐功偉績為一代宗臣而天下之人莫有異議徒以高祖在上而王魏固高祖之臣也然則齊黃諸臣獨非我高皇之臣乎即使睢紆避禍以全身立功獨不得

引王魏以自蓋乎乃皆駢首就戮之死不悔者則大閑之不可踰耳而我國家元氣之正與再世作養之功不可誣也惟是統紀不立史事廢闕寔非細故文皇晚歲稍稍悔悟蓋嘗形諸言矣而當時無有將順之者遂使一時之事泯沒不傳則靖難諸臣不能無責焉自睿皇以還國禁漸弛乃今遂不復諱實維累朝列聖之盛所謂礪生民而窒不軌者固古聖人之意也

甫田集卷十七

其意義其有不相連屬者則益之于兩字之間苟又有不明不盡者則又益之于本行之外學者讀本文而覽旁注不見其意義之不足也惟易旁注則有前圖者易之為易其本也圖象而已文王周公孔子之書實為圖象作注脚故明此經者不得不求其本也河出圖洛出書天不愛道泄諸象數一可已二何居作河圖洛書合一圖第一聖人之則之也八卦成列而又因而重之其傳于今也各有橫圖圓圖而六十四卦圓圖中又有方

圖則亦悉矣帝出乎震成乎艮其方位之象又何為哉  
作先天後天合一圖第二先天後天其始其終既各有  
序矣連山歸藏首艮首坤今不能知而周易首乾坤終  
既未濟經分上下其間卦序乃復如彼作周易卦序圖  
第三卦變也卦主也互體也卦數也卦位也納甲也之  
六者時雖見于經傳必各著其全使人可通考焉可也  
作六圖第四淳安夏氏有讀易十字樞愚平日竊窺于  
易得三大義二者經傳訓釋之機要也則以附六圖之



後聖人處憂患之道自履至巽其傳古其指深以之名  
義殆未足以盡之也作三陳九卦圖第五揲著以求卦  
因變而用爻比義從長宜勿拘一說作著卦變占圖說  
第六夫子言著卦之德曰圓曰方固非其直曰七奇八  
偶而已作著七卦八圖第七邵子天根月窟之吟非為  
今易安注脚也豫章蕭氏周易卦序之學區別于三畫  
六畫之原而象意昭融玩味乎正變始終之故而教道  
明著前纂為圖今錄其全文于後而係以邵子之詩履

運處身同一揆也作三十六宮圖說第八八圖為之前而後周易旁注可得而讀矣

葉宗茂哀詩序

新安葉宗茂有清才年僅四十有四卒于金陵邸見聞者哀其遭時之不偶也為之賦詩而里之老友朱升為之序序曰宗茂葉濂翁之子也生二歲移家于蓼自其幼以敏給聞稍長治進士業從余復卿先生學戴氏記歲丁亥歸就鄉籍試有司明年予歸自燕山取道至蓼

人惟其艱也而又能是也於是相與譽之有弗良亦置弗責其素微無異也使其有一綫之承則人得以比而疵之以為而門戶若是而父兄若是聞見麗澤若是而弗能是是不肖者從而曰是某氏之子也可不懼哉夫門第之盛可懼如此乃不若彼無所恃者之易於為賢豈此之所負固重哉維時恂恭不暴雅篤倫理菑畲所入可以裕愆而顧惟圖史之癖尋核讐校不廢而益勤使其素微無異其誰弗譽之乃今硜硜然保之若猶不

足殆二三前烈有以揜之歟雖然微是二三前烈其孰抵維時之成若是所謂師資源委積而興之者深矣今能不以得之深自多而以負之重自懼斯其至不但保而止也而何盛大不終之足憂邪他日維時徵余言記堂余因就其意以發之若夫保其田廬以拓其植業則一耕暨勤朴者裕為之非余所以望於維時也

沈府君石表陰記。

太史延陵公之表沈府君之墓也稱其良於醫而書其

治療之實嘗驗於人尤彰灼者若干事事核而詳文繁而不殺其法蓋昉於太史遷遷所論次多簡質而於太倉公之事加詳凡所為治病死生驗者幾何人主名為誰及所投療何藥並條列之不厭噫遷殆有意哉而延陵公所為厯厯於是者亦豈苟焉以徇其子孫之意哉而為之子孫者則不可不謂之幸也府君之子鶚既伐石登公之文乃來乞余言刻諸石陰維古縣而寔而墓道樹碑於是有文字以表功德政事其文或周匝書之

漢以降別為文書石之陰者則記碑之闕逸或疏族屬  
支庶而已至柳河東乃悉記其先友名氏於先君石表  
之背用以著其父之交遊之良也而後世誦之謂柳子  
善能顯其親焉府君所交遊余不得而知也而其事則  
有不待先友而必顯者夫以倉公之藝之良固有不可  
沒者而所以不沒則不為無恃於遷何者遷職太史而  
又有良史才故其書古今不廢而倉公之事得以附見  
今延陵搃海內文柄而職亦在太史其表府君之藝之

良雖不敢便謂比隆倉公而所為麗以不沒者視倉公無負也嗚呼是豈徒鐸之幸哉固府君之所恃歟府君之葬一時文學名卿為志銘為誄為挽悼之詞所以發府君之潛者畧備是固府君交遊之良也他日豈獨可以考見先友名氏而已邪

侍御陳公石峯記

莆多名山而烏石在郡城奇麗峭岸實用鍾簫之秀侍御陳公之居在焉公自號石峯蓋取諸此公之言曰吾

名琳琳美玉也然不有治焉斯亦璞而已矣烏所取器  
哉詩不云乎他山之石可以攻玉吾之有取於是非徒  
以山為也夫公以明執法奉天子明命視學南畿士之  
仰公而治者衆矣而公顧為此若有不足焉者嗚呼此  
公所為不可及而足以厲多士率一方也蓋人之情喜  
護其所不及而恬於自恕操辭履事往往賢智自列或  
謬為退託而其心固不欲人之加之也然而卒亦無能  
加人始以其有是心是以不能自固而卒之出人之下



也亦宜矣苟為自下則非有越人之才者不能夫又誰得而尚之公不忘取助於石亦惟其玉哉而況烏石為公之所麗哉或謂一山一石惟人之嗜而公顧欲專之且烏石在莆非可得私也而不知其有所謂獨得者不皆以境也是故嶙峋截業蒼然萬仞其秀若焉其壁立若焉仰睇有肅爰以樹節瞻斯巖巖而端委以之利其廉隅植其靡敗雖若有得於山而實公所素負以立身而率人者而茲山固將假公而重於世也然則雖謂之

公之所有亦何不可哉公以粹美之質履明潔之操而優之以精深宏博之學夫亦至矣而其心每抑下雖以某之無似且在諸生之列而必以記命之是其好學下問優於天下而人將追而莫之及也夫公方以卑抑下人而人至於不可及人亦何為而不思所以置其身哉今江南士習以器業相高譽聞相取下而切劘之功蓋寡公所為拳拳於是者某有以知公非直自為而已也

鐵柯記

少司馬吾蘇劉公自號鐵柯故太保吳文定公及今少  
傳守谿公皆為之說他日以示某曰吾初官內臺念古  
御史冠鐵柱示不撓也於是思有以自勵及嘗觀於松  
栢喬喬千尺貫四時不改柯易葉與鐵參勁竊又慕之  
俄得漢銅章故有鐵柯字此殆造物者成吾志也遂以  
自況而人亦諒之不以為過二公之文雖所取義不同  
實皆吾之意子尚繹而記之某晚學猥劣安敢自列於  
二公顧公之意不可無復也則為之言曰公起家進士

為良有司人為名法從進躋列卿歷事三朝踐敷中外  
餘三十年持防軌法所至必信用是幾蹈不測然甫躋  
即奮更涉險夷而其志愈厲不懾天下士以為至剛而  
不知其所操以用世者有法焉而非徒以氣為也公居  
常若易與而廉稜整整弗少弛立朝不修鷹隼搏擊之  
峻而人憚其嚴有所揆畫必審顧所重而所執惟典憲  
之仍粹遽之途履之若素阻險糾紛持之維中蓋其才  
志圓融足以鼎變需急而視其法不少軒輊夫法之立

也凡以濟天下之事云爾脂韋媼苟事徇情無足論者若夫矯抗直前靡所顧藉而慷慨激烈以階禍首難以求必勝夫剛此足以收其名而已天下之事何賴哉古之大臣在重厚堅定重厚能以法平堅定則能法守法平而守天下之剛孰踰焉公以風聲樹之而取況乎是凡以為法也志乎天下者顧法何如耳奚必矯矯子立求勝於氣然後為能盡其剛哉昔劉器之不為枉矯過激之行而耿挺持達卓有建明至於顛頓困踣曾不

少變而蘇軾氏以鐵漢目之公殆有慕于是者然器之  
迄用斥廢而公受知天子向顯於時此則有遇不過存  
焉公不以其所幸遇自足而顧有取於彼之不獲以用  
自振則雖日益昌達而不害其為錚錚也

太倉周氏義莊家塾記

宗法之立學惟其基也而教從興焉周禮大司徒五家  
為比五比為閭四閭為族五族為黨黨有正族有師閭  
胥比長咸以教也然其為教不過曰敬敏任恤曰孝友

睦嫻其所務而力者莫非親親之事幼而習之既壯行  
之久而安焉雖有間隙乖刺不能出其間矣宗法之易  
行夫豈獨其勢然哉此周氏家塾之所為作也塾之制  
合凡族之子弟而教之其義蓋出於比閭族黨而以宗  
法通之也初周之良曰元學君念其族屬衍大或貧不  
能自拔也思闢義田贍之而力不輔志則篤意教其子  
曰庶幾他日有能成吾志者蓋元學沒而義莊成其事  
實舉於諸子之賢而協而其尤彥而達者曰王府審理

世鄉貢進士在凡事之舉違莊之規約咸從審畫又請於朝下有司撫實加章程焉夫要束之詳所以重後人之守而文法之立固將為債事之防然防有所未至詳有所不及固不若謹其性漸其心而使之濡染於耳目尋常之中之為至也此古之聖賢所為圓天下於至理而教莫先焉教立而理明善復而義篤斯何患乎道之不行事之不集哉以元學君一念之微而能使其子舉其事於既沒數十年之後雖其志有所在而亦諸子服



儒明理之所致也此足以白其教之效矣矧於此而加  
詳焉其事效所至豈獨一家一族而止而實一家一族  
所恃而重焉者其或本之不務而未是資或義之不篤  
而利是圖甚或讒就鬪鬪以隳成業棄禮犯分貽辱前  
人此豈立塾之意哉此正今日周氏諸君所宜置憂也  
余於周有嫌而重其舉有合於宗法且得善後之道故  
樂記其成而必及其可憂者固諸君之意也若其教詔  
之詳有審理君所條塾規茲得畧云

正始堂記

錫故多鉅族往往數百年不輒衰其彌文質行有以垂緒而禮閑義訓寔又引之非獨菑播之勤共倚程省如昔所謂高訾富人而已鄒君時用者宋元祐名臣忠公之裔自其先君承事植義厚生用能充其業至于今若千年而時用君益用衍拓膏腴連延布泉流溢然而人繁物阜浸入靡薄懼不可以訓乃作正始之堂所以示肅中閨而式于百度也於此有節焉曰內行不踰閤外

言不入於閭而弗敢忘也有事焉曰主饋絰箴親蠶潔  
菜而弗能越也夫亦微矣而君子從以觀人故有威加  
宇內而或不能刑于寡妻望隆朝著而不得收譽於鄉  
曲此豈不足於外哉是故先王之治必本於闕雎麟趾  
而葛覃采蘋國風所為詠嘆也夫以霍子孟忠勤慎飭  
勲名塞天一不制於霍顯遂以塗敗而晏子之御徒以  
婦人一言自拔為大夫閨門之効固不可誣也哉易曰  
父父子子兄兄弟弟夫夫婦婦而家道正正家而天下

定矣聖賢之業至於定天下極矣而其本始乃在於閨門之間然則斯堂也非鄒氏所由以盛者歟夫鄒氏有忠公為之基而紹以承事之茂碩又重之以時用之好脩所為引其世而綿其澤無不足者而時用之意若皆不可恃而必有待於是其為慮深矣誠以盛大者慾之所滋而恩之勝也義有所不能克持不能克之恩而濟以方滋之慾其卒也豈惟不能正其家而已邪此時用之所懼而余所為深言也

記中丞俞公孝感

大中丞桐廬俞公文章政業卓然名臣而有至行公之  
父鄖陽公仕成化間為名御史以直言謫判澧州浮沉  
下寮數年再起守鄖陽致仕治任且歸俄遘疾宿留數  
月鄖睦相去數千里聞問不相及而公方以諸生隸學  
官法又不得輒去昕夕憂懸一日以事宿所親家夜聞  
鳴金起坐呼從者曰大人得無有異乎何為惕息不能  
眠也比至果然蓋鄉人在太學者傳鄖陽死矣公投地

大慟絕而復蘇卽夕馳歸謀走鄆候之家人以公身弱  
不習道路百方譬止不從曰吾居此以日為歲其能安  
乎詰朝遂行是歲甲辰五月十有三日也及渡鄱湖瀰  
望皆水公私舟蟻泊莫可致詰迤邐至九江九江舟楫  
往來之衝官於此擁舟焉公遵陸問訊冀萬一邂逅也  
時公憂惶困瘁蓬垢無人色兩童掖之踉蹌行道上人  
問得其故莫不憐之或言官舟不受擁非有故不泊公  
仰天竊嘆方不知所出一人前拜曰郎君何以至此視

之則其家老蒼頭也問其來乃鄖陽夫人道中思鱸泊  
舟求魚方次湖口耳公聞言驚絕掖至舟見鄖陽方無  
恙也相持大慟又絕蓋自上道至此驚潰百出顛仆欲  
絕者屢矣既定叙所歷則公離家之辰正鄖陽解任之  
日而艤舟之頃即公倉遑問道之時也長江渺瀰颿檣  
下上日以萬數風駛水疾一逝千里使其時非以鱸故  
則不泊或泊焉後先差池欲邂逅一見得乎公父子相  
去數千里非有期集徒以一念之誠而求諸去來瞬息

之頃如投券取物不爽晷刻殆有神出于其間非公孝誠純至何以臻此既而鄆陽道卒嘗藥視斂公得盡心焉不然公且抱無涯之悲而向者鄉人妄傳豈亦天有以啓之耶嘗讀宋史丹稜唐伯虎者其父游瀘南伯虎夢收父書有亟來字夜蹴其弟庚曰父得無他乎吾心動矣即日裹糧趨瀘南黎明走洪川將僦舟而江水盛怒聲搖數十里客舟布岸不敢動伯虎徬徨堤上得漁艇跳入叱僕夫解維抵瀘而其父果病遂迎侍以歸居



數日而卒伯虎仕不顯無他政業可書獨以茲一事得  
列史官作史者殆有意也公之事與伯虎類而公投足  
於渺茫無據之地以取必於去來瞬息之間其事視伯  
虎又有不偶然者顧公方向顯於時奇功雋烈將彪炳  
簡策此特其一節耳雖然君子論人必於其微觀公為  
是其卓絕之行已槩見於平居未仕之時而况孝為百  
行之源可以一節少之乎敢私列之以俟操史筆者公  
名諫字良佐其父名蓋字某

王氏敕命碑陰記

封監察御史王公瑾受命之十年正德庚午卒於吳門里第又三年葬陽山大石塢於是其子高州府通判獻臣奉公所受制詞勒石墓道其言若曰臣獻臣鄙謬弗率荷蒙先皇帝拔擢參聯諫列三載考績不以獻臣無似俾得推恩其親而先臣瑾實與賜焉同時雖多被命而親存者無幾又在遠外內廷恭謝先臣瑾一人而已鴻恩休命所為寵賁臣父子者至深厚也臣獻臣日夕

兢懼思効萬一以圖無負先皇帝之知用有糾繩靡復  
顧忌旋被中傷幾臨不測或教先臣瑾求援當路毅然  
不從曰吾子之仕吾固教之忠矣苟不率職則國有明  
憲明天子在上吾敢貳於吾君以行吾私哉臣獻臣卒  
賴先皇帝之仁獲保首領比歲中外多事一時寵命或  
被追奪而先臣祗修慎履迄保榮名以沒凡以荷先皇  
帝之明也獻臣不有表章是忘先皇帝之明棄前人之  
烈也獻臣為是懼今茲歸守先臣墳墓顧瞻鼎湖薄天

萬里圖惟日光雲章垂耀琬琰而未死餘生庶幾猶在  
昭回之下爾於戲盛哉狐突有言子之能仕父教之忠  
古之制也策名委質貳乃辟也父教子貳何以事君觀  
於王公之事其猶狐突矣乎突遇晉懷不免刑戮而公  
遭逢昌會既已賁及其身而褒揚德義又特被之綸綬  
垂示無窮是豈獨王氏一家之幸而已哉某與公通家  
目覩其盛敢遂論次其語列諸石陰

甫田集卷十八

欽定四庫全書

甫田集卷十九

明文徵明撰

記五首

沈氏復姓記

長洲朱天民既復姓沈氏來言於余曰吾沈氏世居吳中相傳數百年矣我先君壻於朱先外祖廷禮無子養外孫為孫故吾兄弟皆氏朱而嗣於朱於是四十年餘

矣某自知事便思復之顧氏名錄於學官不可私易也  
會御史按學吳中得以情告下其事有司如所請乃以  
正德戊寅正月之朔告於先祠復令姓易名曰民望歸  
嗣於沈求於朱之族得再從姪輪告於廷禮之祠使嗣  
於朱嗚呼自吾失姓來恒懼不得追復其始以斬先世  
之澤貽辱先人今幸而獲志不可無言以示我後人子  
其為我記之竊惟古者天子建德因生以賜姓而子孫  
別而為氏故有以字氏者有以諡氏者以官以爵若事

者今之姓即古之氏也古氏雖多所從然莫不各本其所始百世而下雖叅錯紛糾可以一考而得其說雜出於傳記而左氏特書之不可廢也自秦有贅子子孫乃有以外氏為氏者吾吳中故多秦贅緣是而易姓者十室而四五至有名世大臣不能免者馴而習之往往不知其姓之所自出不知姓之所自出而昧昭穆之叙歐陽子以為雖禽獸不若也夫人而至於禽獸不若亦已甚矣而其所失乃在於區區姓氏之間然則人可以不

知所謹哉間井小民困陋習敝無足異者而名世大臣  
足以有為乃不知出此在當時豈有甚不得已者乎及  
今歲月既遷族屬衍大雖有賢子孫無能為矣豈非常  
時之罪哉天民為此其亦無使後之人有慨於今日也  
若其緣情據禮續廷禮之嗣實惟仁道所在而不忘所  
始有孝存焉天民庶幾知仁孝之理哉

褒節堂記

正德八年癸酉御史按河南上言汝寧民劉漢死妻余



年十九夭死弗貳漢且葬喪行而水至余阻不得渡便  
哭踊溺水自殞父母救出之尋就雉經亦以覺免既求  
死不得乃撫二歲孤林以居閱三十有五年養舅姑以  
壽終子亦成立今余年五十有三法應旌表事下所司  
核實以聞詔旌其門曰貞節有司奉詔書事惟謹乃十  
年乙亥樹表復其家如制於是其子亦登名薦書為鄉  
進士矣乃作褒節之堂用侈上命他日以縣文學來教  
長洲進其門生文某使為記曰吾微母夫人無以有今

日微明天子至恩無以昭母夫人之德如今日此吾所為名堂也余惟我國家以彝倫正天下而節孝莫先焉誕章敷治每申飭之有司課績用為殿最若是重矣然而以天下之大民物之庶而歲之所上不能幾人推核之餘能終與明詔者加鮮焉其事誠有不易至者而非徒以其節也於此有限列焉年未三十而寡及五十而後旌未及五十與三十而寡者不與也夫豈以其非節耶惟是天下之大民物之庶非有限列焉則事力有所

不及巧偽有所不能防其勢不得不然而人之所遭有幸不幸是故自其始遭比於五十踐更涉歷非獨一時而艱難變故非只一事幸而得全者蓋亦有數不幸不及年而死又不幸無子或有子而非賢皆所不得也此又出於法制之外有非吾人所得而強焉者而曠蕩之恩固所不能周也若余夫人之事與年足登法式而合於褒表矣然非有吾師文學君之賢以為之子其旌與否不可知也吾聞夫人之於文學也慈不忘教期於必

成其始非直為今日也而今日之事卒用賴之夫豈幸而致哉文學君不忘母訓推行國恩以為是堂其亦有意乎哉其教吾邑也軌法緒正必舉其職嘗曰吾惟無負吾君以求無遺吾母之憂耳是固名堂之意也而吾於此得忠孝之理焉是為記

長洲縣重修儒學記

嘉靖十有五年歲在丙申秋八月長洲縣重修儒學成乃是月四日丁亥知縣事渭南賀侯躬率博士弟子釋

采於先師孔子新宮桓桓豆籩惟飭陟降旋辟儼肅有儀父老賓屬爰觀爰慶謂數十年來所未有既明日諸博士弟子相率言於某曰惟茲長洲實蘇之輔邑邑有廟學而制統於郡故事月朔廟謁春秋有事縣官師生旅拜於郡學以為故常有祭田瘠薄不足更費歲時惟學官行事而有司不與也頃歲有司之賢者間一行之牢醴狼籍取具臨時而其事亦不恒舉夫有司之賢有才者固足集事而或不然則委諸故事是故或舉或不

舉惟其人而學之廢興以之茲學之建昉自宋季即淳  
屠氏藏殿為之陋隘弗稱歷元及國朝數有建置而踵  
其痺陋無所展拓正德丁丑提學御史安福張公鰲山  
盡斥僧廬益之而未暇改為也侯始至以學校首政顧  
月朔不得專謁則以次日將事視學弗葺且敝慨然以  
起廢為任節用制財乘時僦工爰相厥攸亟請於監司  
於郡守既議克協悉撤其故而新之首禮殿次兩廡次  
講堂齋廬從而戟門繚垣以若廩庾廬涵之屬亦以次

告成礱以密石華以丹堊翬異嚴翼實完實堅乃斥隙  
地俾居民占業而稅其閒架年其所入以給歲祀於是  
廟學之制始備而禮文始益弗僭謂某故學諸生也俾  
有述焉維古士見於師以萊為贄故始入學者必釋萊  
以祀其先師是故有學則有廟廟而弗祀猶無廟也長  
洲為東南望邑學視上庠官有常負士遊於學有常額  
而庠有廩餼事皆應於法而有廟弗祀豈其制則然殆  
有司之失也侯之為是豈獨行禮哉亦所以復國家立

學之制焉爾夫學校之設所以育英才以為致禮之具其法自三代而下惟我國家為詳而其任為特重蓋仕者必選自有司舉於禮部然後登用於朝然非學校無自而升也故進雖多途惟學校之出為正而他途者不與宋慶歷間嘗詔天下立學矣然惟州郡有之縣不滿二百人者不得立至於學制雖見於程子之議而實未嘗用今內自畿甸外而荒服偏州鄙邑莫不有學學必具官士必板列必選於民秀而考其行能閑衛升黜必



有法程而所授受肄習必孔氏之教莫不切於治理周  
於實用粹然一出於正嗚呼學校之習一出於正則凡  
有司之所選禮部之所舉與夫朝廷之所登用有不正  
焉者不可得也故百餘年來名卿鉅人所以出而為國  
家之用其立言立事與夫致身效命者莫非學校之出  
而出他途者蓋鮮也夫正學之效章明較著如此近時  
學者或厭其卑近而遊心高遠於凡語言文字禮樂刑  
政之屬一切以為支離靡爛為不足為而惟坐談名理

標示玄邈以為道在是矣而推究厥用不知其所以立  
言立事與夫致身效用於昔人何如也吾侯所為惓惓  
興學之意其亦有所擇哉或謂習久不滋事日就弛今  
之所謂學校特文具耳而何以興為是覩其迹而不知  
所以探其原也孔子曰君子之道譬猶防焉以舊防為  
無用而壞之者必有水敗以舊禮為無所用而去之者  
必有亂患侯其知所防哉侯名府字應璧己丑進士仁  
明愷弟而敏於政是役特其一事耳相是役者縣學教

諭建昌李泓訓導安仁熊魁烏程潘佐董役者義官張  
璣

玉女潭山居記

宜興諸山銅官離墨最巨其次穿石山峻截不如二山  
而巖竇虛疑湍瀨聯絡窳突瑰譎最為奇勝而張公洞  
最有聞玉女潭在張公洞西南相去不三里而近相傳  
玉女嘗修煉於此唐以前名賢勝士多此遊覽而李幼  
卿陸希聲蓋嘗居之一時倡酬篇詠流傳至今有以想

見其盛也自後湮塞不通人鮮知者漂陽史恭甫葬母  
山中土人有以其地售者恭甫喜而得之乃疏土出石  
決澮導流剗闢蠲刈盡發一山之勝幽巖絕壑靈湫邃  
谷悉為標表而茲潭實首發之潭在山半深谷中渟膏  
碧瑩潔如玉三面石壁下挿深淵石梁亘其上如楣而  
偃草樹蒙幕中深黑不可測上有微竅日正中流影穿  
漏下射潭心光景澄澈俯挹之心凝神釋寂然忘去潭  
之滑有坻即坻為臺構重屋其上曰玉光閣閣成而潭

之勝益靚以顯潭石之巔有靈應亭山中嘗旱禱於潭而雨因為亭以識潭四周無隙水伏流而南出巖石之下匯為小池玉潔不流為亭其上曰凝玉凝玉之西淵泓洄狀其流漸駛別疏一渠激其流北出行亂石間緣石旋轉可以流觴曰流觴嶼凝玉之南古櫟一株根柯鬱磳礧礧如石獨孤及詩所謂日日思璫樹者即此其下湍瀨滌洄與樹映帶曰璫樹湍漱玉軒在焉湍流西下折旋而南屬於灣碕石累屬如龍馬下飲如砥柱中

轟水奔注激射如鬪再折而東水益駛石亦益竒夭矯如虬蟠如鼉奮飛流噴薄濺沫成輪聲震蕩如行峽中曰虬鼉峽峽左石梁曰沸玉橋踰沸玉橋而北地多美箭間以江梅曰梅竹隩琅玕所聽玉窾在焉又北偃沼如初月曰生明池絕沼為梁曰隔凡橋隔凡而上則玉陽山房也中為玉虛堂周堂為八室室三楹依易卦為面勢隨方署名曰純陽曰中陽曰初陽曰循陽曰明陽曰通陽曰來陽曰升陽自升陽北出地漸高且廣蓋山

之麓也因山為臺塏爽層出陟級而上延閣若干楹前  
軒施檻可以肆目曰大觀廊廊之後為丹室又後為雲  
耆臺臺方三十尺有奇始築臺而耆生也又其後為環  
玉岡由環玉岡東下出雲耆臺之左曰澄觀樓其前為  
上元祠又前為東岡別館為護雲莊為仙寓仙寓之南  
為來仙橋由環玉岡而西轉出玉潭之後築祠奠焉曰  
玉清祠祀玉女也祠右隙地白礫累累散臥松竹間如  
羊曰初平林出初平林西行二百步巨石盤踞環匝如

壩曰盤玉隈自盤玉隈西上繞出山椒有亭直太湖之  
縹緲峯曰縹緲亭亭下怪石林立鯨鯢獸伏競為奇狀  
嘉木出石罅一本七幹挺特修聳與石爭秀曰琪樹峽  
琪樹峽之西為集靈谷又西為飛雲洞自此下上登頓  
緣石逕而行逕盡出於山脊平壤空曠梵以文石曰瑤  
臺負臺為室曰超然宇宇後羣石掀舞如華葉駢植聯  
延如睥睨曰芙蓉城石之有奇者曰天成碑曰雨霽曰  
小蒼弁曰青驪巖曰三珠洞曰二姑曰雙仙皆以狀類



名而二姑雙仙之間有期仙壑由期仙壑東下二百步  
為文殊峯又東為普賢峯觀音巖在焉山自環玉岡而  
下左右盤互蜿蜒不絕總若干畝其中臺榭樓閣祠宇  
杠梁凡三十有一林壑巖竇可名者二十有三他細瑣  
不暇紀者不在也以其地在玉女潭之陽因名玉陽山  
而標其前曰玉陽洞天玉陽洞天東境之可紀者四  
金晶巖最勝巖去玉陽五百步軒揭如垂石下燾巉顏  
如斷齧深廣十尋其中石壁竒峭水出壁下平流兩涯

交絡如織瀕水石坻可羅坐十客水環之如玦巖石晶瑩日射之灼爍如金故云金晶金晶巖之東稍南曰佛窟窅陜邃深中空洞可居別竇尤深秉炬而入詰屈不可窮其北為回陽洞玉潭之水至是回流而南故曰回陽青鳥磯在焉其上有留仙橋踰橋而東為鐘竇水激其中聲洪如鏞也玉陽洞天西境之可紀者六龍湫最勝湫去玉陽數百步在積石之下而淵潛澄湛微類玉潭懸艇而入中空如室石皆下垂崕岬岸等不可名

狀其後石壁挿水壁盡處有穴劣可容舟歛仄以入中空如外室而通明虛敞石尤奇麗緣石而上得穴甚隘倮而入轉出石室之下中空如土室石柱合抱色正白如玉曰玉陽洞此龍湫尤異處龍湫之西曰水犀洞水足勝舟而石壁幽峭石上有穴通天故曰水犀其水潛行而南出於南洞磐石之下石平行可坐水濺之如浮曰浮磐浮磐之南為君陽洞洞凡三穴最後一穴稍深曰白龍藏三洞相屬石皆穿漏如蹄股交峙水瀉其間

湍激若瀧揭跣行可環遊出入彼此嘯呼與水聲相雜亦一奇也水自凝玉而來東南互流至此凡百折乍盛乍微乍浮乍伏而其源皆出於玉潭石自玉潭而來或隱或見亦皆綿亘相屬其間松檜梗楠幽蘭靈卉叢生蔓被與水石相蔽虧周遊其中若去塵寰歷異境既違復合若窮而通綺錯繡綰不出里道而羣景畢集殆造物者効奇呈異獨媚於茲以成一方之勝如此夫自清濁肇判流峙攸分而是境已具其前未暇論考之唐賢篇

詠玉潭之外他固未有聞也由唐至今八百餘年始自  
恭甫發之豈天秘絕景必待其人之賢而勝者而授之  
耶恭甫以粹美之質具有用之才不究於時而肆情丘  
壑挖竒抉異發幽而通塞俾伏者以顯鬱者以申而無  
有所蔽夫其志豈直山水之間而已哉昔謝康樂伐山  
開徑以極遊放柳子厚發永柳諸山而著為文章皆以  
高才棄斥用攄其抑鬱不平之氣耳或謂恭甫類是而  
實非也恭甫恬靜寡欲與物無忤而雅事養神邂逅得

此用以自適而經營位置因見其才初非若二公有意於其間也雖然二公在當時或有異論而風流文雅千載之下可能少其名乎嗚呼地以人重人亦以地而重他時好奇之士遊於斯庶幾有知恭甫者

重修蘭亭記

紹興郡西南二十五里蘭渚之上蘭亭在焉郡守吳江沈侯省方出郊得其故址於荒墟榛莽中顧而嘆曰是晉王右軍脩禊之地也今禊帖傳天下人知重之而勝

蹟無廢宇土者不當致意耶既三年道融物敷郡事攸  
理乃訪求故實稽遺起廢時其羸趾以次修舉而蘭亭  
嗣葺焉亭所在已非故處壞且不存而所謂清流激湍  
亦已湮塞乃翦弗決澮尋其源而通之導其流行於故  
址左右紆回映帶彷彿其舊而甃以文石視舊加飭闢  
其中為亭棟棟輝吳欄楯堅完墨池鵞沼悉還舊觀經  
始於戊申之闕成於己酉之闕不亟其工也侯於是集  
僚友賓客而落之以書抵余俾紀其成余惟右軍去護

軍而為會稽也其歲月不可考而開倉賑饑上疏爭吳會賦役與執政書極陳郡中敝事其於為郡盡心焉爾矣蘭亭之會殆其政成之暇歟昔人謂信乎則人和人和故政多暇余於右軍蘭亭之遊有以知當時郡人之和已至其兩諫殷浩北伐而策其必敗若會稽王須臾立勢舉而後可以有謀不然社稷之憂可立而待當時君臣漫不加省而卒皆蹈之晉之為國迄以不競迹其所為豈空言無實者使其得志行其所學而功烈施置



當不在茂弘安石之下時不能用而斂其所為優游於  
山林泉石之間至于誓墓自絕嗚呼豈其本心哉若其  
所謂虛談廢務浮文妨要斯言也實切當時之敝而以  
一死生齊彭殤為妄誕於斯文特致慨焉其意可見已  
自永和抵今千數百年國有廢興人有代謝而蘭亭之  
名迄配斯文以傳其事又有出於泉石遊觀之外者君  
子於此蓋有所識矣夫遊觀雖非為郡之急而考古尚  
賢亦有政者所不可廢矧蘭亭諸賢皆天下選文雅雍

容極一時之盛委蛇張弛古訓攸存文章翰墨又所未  
論也然而文翰之美自茲以還亦未見的然有以過之  
者則夫所以掩其心志而失其實者有以哉史稱其清  
真任率釣弋自娛亦言其迹云耳故余於沈侯之請特  
著其心之所存出於晉諸賢之上如此然則沈侯斯亭  
之復也豈獨遊觀為哉是役也侯首捐俸入以倡而一  
時僚案若通守蕭君奇士推郡王君慎徵咸有所助貳  
守俞君汝誠最後至復相厥功於法皆得書因附著之

侯名啓字子由

甫田集卷十九